

Commoda privatum civis bonus obtulit aurum
 Concilio in magno: præclara exempla secutus
 Quisque suas effundit opes; renovatur in hostem
 Impetus aggestis auri, argentique talentis,
 Ac Veneta Odrysius rursus timet arma Tyrannus.
 Idem & Francigenam Regem, Regemque Sabaudum
 Convenit, & Latium patria legante Parentem.
 Illum etiam sumptis metuendum vidit in armis
 Eridanus, qua se Adriacas evolvit in undas,
 Præstantem illæsos fines, hostesque fugantem.
 At folio tantam virtutem effulgere ab alto
 (Nunc sæclum decies decimo completur in anno)
 Dat patria, & meritam diademate cingere frontem.
 Quæ Tyrio Heroem effulgens comitatur in ostro
 Turba patrum, quæ turba ducum se ostentat in armis
 Circumstans! Illi nova jura probante Senatu
 Condiderunt: illi miti ditione beatos
 Rexerunt populos: illi in regalibus aulis
 Præstiterunt Oratores: (9) ter tertius annus
 Post terna effluxit jam sæcula tempore ab illo,
 Quo procul Eoæ missus Babylonis ad arces
 Ille Orator iit gentis decus: hic (10) & in aula
 Austriaca Orator quondam, & Mavortis in arte
 Acer in hostiles, gnato comitante parentem,
 Dux equitum fines irrumpit victor: at (11) ille
 Oratorque itidem Latiam Legatus ab urbem,
 Idemque & classi, & castris præfectus eodem
 Omne bella gerit victor terraque, marique.
 Talia dicentem, & longo sermone vagantem
 Singula per capita abrumbo, atque his occupo dictis:
 Siste, precor; nam tempus abit: sat nomina gentis
 Cujusque, & primos utroque ex agmine pandas.
 Ille quis, incurvo pariter cui tegmine crines
 Velantur, dextraque nitent gemmantia sceptrâ?

Tum